

■ CONVIVENZA

La dumonda decisiva

DA VIOLA PFEIFFER*

Tge ha el pomai pensà, cura ch'el ha inventà la munaida», marmugna in ami durant piclar in pèr francs per il café ord la bursa. «Tgi?», dumond jau. – «Oh, Dieu natiralmain.» – «Ti pensas pia che Dieu saja in um?»

Atgnamain lev'jau mo provocar in pau, ma sia resposta tutga la noda: «Oh, sch'i n'ha gia sin terra naginas dunnas en posiziuns da cader na poss jau betg m'imaginar che quai saja auter en tschiel.»

Nus avain gist discutà la situaziun insupportabla terrestra, uschia ch'jau ma concentresch uss sin la part celestia da sia resposta: «Jau n'avess betg pensà che ti sajas ina persuna crettaivla.» – «Oh, na, sun jau era betg. Jau sun agnosticher ord persvasiun.»

Jau revolv ils egl. Ils agnostichers èn ils novs ateists. Il pli nov trend confessiunal. «Ti na stoss gnanc revolver ils egl. Quai è ina persvasiun bain ponderada», ma declera el. «Guarda, sch'ins è agnosticher èn ins sin ina megla via che sch'ins tscherna ina religiun.» – «Declera quai ina giada al papa.» – «Bain, propi. Sch'jau di simplamain ch'jau na saja betg segir, na po nagin chastiar mai. Sch'jau stun lura pia davant il portal celestial



cristian stun jau meglier ch'insatgi che crai vi da Buda. Jau na vom forsà betg ina lingua en l'enfiern e mo in pèr onns en il purgatièri. E tar ils muslims na chat jau probablamain betg gist 72 dunschellas, ma forsà hani gea anc danvanz ina u duas. Jau hai almain meglaras chartas che ti.»

Jau hai dubis che quai cun las dunschellas valless era per mai, ma na di nagut. Avair ina religiun è tenor mai in pau sco avair in penis. Igl è flot dad avair in ed era dad esser losch dad el. Ma ins n'al duess betg pachetar or en publicitad ed era betg chatschar el nundumadadamain ad autra glièud en fatscha. Ins na duess betg pensar cun el e betg scriver dretgs cun el. Ma sch'ins è sulet a chasa pon ins pervia da mai far cun el tge ch'ins vul.

Na manegias betg ch'ìls dieus han ina clausula per opportunistis religiun?», dumond jau pia. – «Oh, jau na schess betg ch'jau saja opportunist. Jau di simplamain ch'jau na sai nagut, e sch'insatgi vegn da

persvader mai è quai er en urden.»

Jau stoss admetter che quai na tuna betg mal. Jau hai dentant ina tenuta detg antiautoritara envers tut ils concepts patriarcals e pir da dretg envers umens vegls che ma vulan dir tge ch'jau haja da crair. Las religiuns ch'jau enconusch ma paran pervia da quai tuttas fitg dischavantagiusas per mia persuna. Sch'jau stun in di davant las portas celestias e la persunificaziun da Dieu en furma d'in um vegl cun barba ma di: «Viola, ussa vesas co ch'igl è propi: sin terra sco en tschiel. Las posiziuns da cader èn deplorablamain gia occupadas da Gieri, Gian e Giachen!», ma volv jau probablamain stante pede e vom immediat e voluntarmain en l'enfiern.

Nus bandunain il restaurant. In pèr pass vinavant ans roga ina murdieua per in pèr raps. Jau stgav nauadora in pau munaida ed ella va vinavant tut cuntenta. «Sas», di jau. «Sche la munaida è propi vegnida inventada d'ina forza superiura ma pudess jau m'imaginar per tge.» – «Gea», di l'ami. «Ma lura è la forza superiura probablamain stada ina dunna.»

*** Viola Pfeiffer ha studegià germanistica, istorgia e rumantsch a l'Università da Turitg. Mintgatant lavura ella vi da sia dissertaziun e mintgatant sco scolasta, ma bunamain adina scriva ella.**